



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta na I. nastavku 54. redovne sjednice održanom 30. oktobra 2019. godine, usvaja

ZAKON
O IZMJENAMA I DOPUNAMA ZAKONA O PLATAMA I DRUGIM NAKNADAMA SUDIJA
I TUŽILACA U BRČKO DISTRIKTU BOSNE I HERCEGOVINE

Član 1

U Zakonu o platama i drugim naknadama sudija i tužilaca u Brčko distriktu Bosne i Hercegovine (Službeni glasnik Brčko distrikta Bosne i Hercegovine, br. 1/06 i 21/14), član 2 mijenja se i glasi:

„Član 2
(Osnovna mjesečna plata sudija)

Osnovna mjesečna plata sudija iznosi:

- a) za sudiju Osnovnog suda Brčko distrikta BiH 3.000,00 KM,
- b) za predsjednika odjeljenja Osnovnog suda Brčko distrikta BiH 3.200,00 KM,
- c) za predsjednika Osnovnog suda Brčko distrikta BiH 3.600,00 KM,
- d) za sudiju Apelacionog suda Brčko distrikta BiH 3.600,00 KM,
- e) za predsjednika odjeljenja Apelacionog suda 3.800,00 KM,
- f) za predsjednika Apelacionog suda 4.000,00 KM.“

Član 2

Član 3 mijenja se i glasi:

„Član 3
(Osnovna mjesečna plata tužilaca)

Osnovna mjesečna plata tužilaca iznosi:

- a) za tužioca Tužilaštva Brčko distrikta BiH 3.000,00 KM,
- b) za zamjenika glavnog tužioca Tužilaštva Brčko distrikta BiH 3.300,00 KM,

c) za glavnog tužioca Tužilaštva Brčko distrikta BiH 3.900,00 KM.“

Član 3

U Zakonu o platama i drugim naknadama sudija i tužilaca u Brčko distriktu Bosne i Hercegovine iza člana 7 dodaje se novi član 7a koji glasi:

„Član 7a

(Naknada za prekovremeni rad, rad u neradne dane, noćni rad i rad u dane državnih praznika)

U slučaju pripravnosti i dežurstva, prekovremenog rada, rada u neradne dane, noćnog rada ili rada u dane državnih praznika, sudija i tužilac imaju pravo na naknadu u skladu s podzakonskim aktom koji donosi Pravosudna komisija Brčko distrikta Bosne i Hercegovine.“

Član 4

Član 10 mijenja se i glasi:

„Član 10

(Naknada prilikom odlaska u penziju)

Sudija i tužilac imaju pravo na naknadu pri odlasku u penziju (otpremninu) u visini svojih pet ostvarenih prosječnih neto plata isplaćenih u prethodnih pet mjeseci.“

Član 5

Iza člana 12 dodaju se novi članovi 12a i 12b koji glase:

„Član 12a

(Naknada za slučaj povrede na radu, teške bolesti i invalidnosti)

U slučaju povrede na radu sudije ili tužioca, teške bolesti ili invalidnosti sudije ili tužioca ili člana njegove uže porodice, isplaćuje se jednokratna novčana pomoć u visini od dvije prosječne neto plate isplaćene u Brčko distriktu Bosne i Hercegovine prema zadnjem objavljenom statističkom podatku.

Član 12b

(Naknada za slučaj smrti)

(1) U slučaju smrti sudije ili tužioca, članovima njegove uže porodice se isplaćuju troškovi sahrane u visini od četiri prosječne neto plate isplaćene u Brčko distriktu Bosne i Hercegovine prema zadnjem objavljenom statističkom podatku.

(2) Članom uže porodice sudije ili tužioca, u smislu člana 12a i stava 1 ovog člana, smatraju se bračni i vanbračni drug, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno do 26. godine starosti ako se nalaze na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojitelji), braća i sestre bez roditelja do 18, odnosno do 26. godine ako se nalaze na redovnom školovanju i nemaju drugih prihoda već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na starosnu dob, i unučad ako nemaju roditelja i žive u zajedničkom domaćinstvu sa sudijom ili tužiocem.

(3) Naknada iz stava 1 ovog člana isplaćuje se i u slučaju smrti člana uže porodice sudije ili tužioca.

(4) Ukoliko u istom sudu ili tužilaštvu rade dva ili više članova porodice, troškovi sahrane iz stava 1 ovog člana se isplaćuju samo jednom zaposlenom članu porodice.“

Član 6 **(Stupanje na snagu i primjena)**

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-699/19
Brčko, 30. 10. 2019. godine

PREDSJEDNIK
SKUPŠTINE BRČKO DISTRIKTA BiH

Esed Kadrić